

26/08/2001

Megawati lawat Malaysia

KUALA LUMPUR: Presiden Indonesia Megawati Soekarnoputri akan melakukan lawatan negara dua hari ke Malaysia bermula esok.

Lawatan itu, yang kali pertama sejak dilantik sebagai Presiden pada 23 Julai lalu, adalah atas jemputan Yang di-Pertuan Agong Sultan Salahuddin Abdul Aziz Shah.

Menurut kenyataan Wisma Putra, Megawati akan diiringi suaminya, Taufiq Kiemas, Menteri Hal Ehwal Luar, Noer Hassan Wirajuda dan delegasi 60 anggota.

Ketika lawatan, Presiden Indonesia itu akan mengadakan pertemuan dengan Perdana Menteri, Datuk Seri Dr Mahathir Mohamad.

Kedua-dua pemimpin dijangka membincangkan kerjasama dua hala dan bertukar pandangan mengenai isu kepentingan bersama serantau dan antarabangsa, menurut kenyataan itu.

Megawati juga dijadual menghadiri jamuan negara yang dianjurkan oleh Yang di-Pertuan Agong dan bertemu masyarakat Indonesia di sini.

Kerajaan Malaysia yakin bahawa lawatan Megawati itu akan memperkukuhkan lagi hubungan erat yang sedia terjalin antara Malaysia dan Indonesia demi kepentingan bersama kedua-dua negara dan rakyatnya, menurut kenyataan itu.

(END)